

'Lindungi nyawa, ambil vaksin'

Mac 27, 2022 @ 2:42pm

KUALA LUMPUR: Individu yang belum divaksin terutama warga emas dan yang mempunyai komorbiditi diingatkan tidak memperjudikan nyawa dan segera mendapatkan vaksin untuk perlindungan maksimum terhadap COVID-19.

Presiden Persatuan Perubatan Malaysia (MMA), Dr Koh Kar Chai, berkata walaupun gejala COVID-19 dengan varian Omicron kebanyakannya ringan, ia tidak selalu berlaku lebih-lebih lagi jika sistem imun semula jadi seseorang itu lemah.

"Masih ada kemungkinan gejala teruk apabila dijangkiti virus, walaupun mereka telah divaksin, apatah lagi mereka yang belum menerima suntikan utama," katanya dalam kenyataan di sini, hari ini.

Dr Koh juga mengingatkan warga emas dan mereka yang mempunyai komorbiditi tidak berlengah dan berjumpa doktor keluarga jika mempunyai sebarang ketidakpastian.

Katanya, langkah ProtectHealth menyediakan perkhidmatan vaksin di rumah kepada warga emas yang tidak dapat ke pusat vaksin amat dihargai namun mungkin sudah terlambat bagi orang ramai menggunakan perkhidmatan ini dalam masa yang singkat.

"Walaupun warga emas itu mungkin berada di rumah sendiri atau pusat jagaan, penjaga perlu hadir ketika vaksinasi," katanya.

Selain itu, katanya, bukti menunjukkan mereka yang telah divaksin dengan dua dos vaksin Sinovac memerlukan dos penggalak untuk memastikan tahap imuniti mencukupi terutamanya mereka yang berumur serta mempunyai komorbiditi. – BERNAMA